

四庫全書

子部

欽定四庫全書

羣書考索後集卷二十七

宋 章如愚 編

士門

學制類

宋朝神宗熙寧元年正月壬寅詔太學增置外舍生
百員初太學置內舍生二百員官為給食至是員足
遠方之士待次而入者蓋百餘人諫官滕甫劉庠並

以為言故有是詔

新記書增太學生百人舊記不書

熙寧元年五月

羣臣準詔議學校貢舉多欲變改舊法獨殿中丞直史館判官告院蘇軾奏曰得人之道在於知人知人之法在於責實使君相有知人之才朝廷無責實之政則公卿侍從常慮無人況學校貢舉乎雖復古之制臣以為不足矣臣願陛下明敕有司試之以法言取之以實學通經術者雖樸不廢稍涉浮誕者雖工必黜則風俗稍厚學術近正庶幾忠實之士不至蹈

衰季之風則天下幸甚上得軾議喜曰吾固疑此得

軾議釋然矣

長編

○熙寧元年五月知制誥宋敏求因

轉對上言州縣有學舍而無學官四方之士輕去鄉里者以求師也請州置學官三歲以下務得士三百人今請二百人試詩賦論策糊名通考之如舊其百人請如赦文令州郡論薦轉運使審覈之太學生則委判國子監官至御試隨其所學而試之學有師故士不輕去鄉里隨其所學而試之則文辭經藝行實

之人皆無遺也其後官不數變易太學建三舍命舉人以官州置學官三路取百人多敏求發之也○熙寧四年十二月辛亥詔每歲加賜國子監錢四千緡以增置學官生員用度不足故也○熙寧五年八月辛卯國子監外舍生以七百人為額日給食歲賜萬緡戊戌詔賜懷州州學牧馬草地十頃○熙寧五年八月戊戌賜太學生葉適進士及第為試校書郎睦州推官鄆州州學教授適處州人管勾國子監張

琥等言適累試優等也○熙寧六年三月丙辰詔諸路學官委中書選京官朝官選人或舉充又詔諸路擇舉人最多州軍依五路法各置教授一員委國子監詢考通經品官及新及第出身進士可為諸路學官即具所著詞業以聞○熙寧十年二月戊子詔以光州固始縣戶絕田賜國子監贍生員太學西門修築射圃聽諸生遇假日習射並從管勾國子監黃履請也○元豐二年五月戊辰朔上批太學外舍生檀

宗益上書所論完整學事頗有條理疑其應務之材
在所司試判國子監李定嘗保奏自入學無殿罰同
齋諸生稱其素行無缺可試校書郎充太學錄○元
豐二年八月丁巳詔益太學生員舍為八十齋每齋
屋五間命入內東頭供奉官宋明臣管勾修展○元
豐二年十二月乙巳御史中丞李定等言竊以取士
兼察行藝則是古者鄉里之選蓋藝可以一日而校
行則非歷歲月不可攷今酌周官書考賓興之意為

太學三舍選察升補之法上國子監敕武令并學令
凡百四十條詔行之法太學生檀宗益上書言太學
教養之策有七一尊講官二重正錄三正三舍四擇
長諭五增小學六嚴責罰七崇司業上覽其言以為
可行命定與畢仲衍蔡京范鏗張瑄同立法至是上
之太學置齋舍八十齋容三十人外舍生二千四舍
生百總二千四百生員入學本貫若州給文據試而
後八月一私試歲一公試補內舍生間歲又一試補

上舍生封彌謄錄如貢舉法而上舍則學官不與考校諸齋月書學生行藝以帥教不戾規矩為行治經程文合格為藝齋長諭學錄正直講主判官以次考察籍記公試外舍生入第一第二等衆以所書行藝預籍者外內舍內舍生試入優平二等衆以行藝升上舍分三等俱優為上一優一平為中俱平若一優一否為下上等命以官中等免禮部試下等免解以升補人行藝進退計人數多寡為學官之賞罰緣外

舍為姦者論如違制律不用去官赦原學正增為五人學錄增為十人學錄叅以學生為之○元豐三年正月辛巳詔改國子監直講為太學博士每經二人○元豐三年正月癸未增國子監歲賜錢萬五千緡以國子監言歲費錢三萬七千緡而所入纔二萬三千緡也○元豐三年四月辛酉增國子監歲賜錢六千緡初給外舍生食人月為錢八百五十至是增至千一百故也○元豐三年五月乙丑編修學制所言

奉旨立勢要及國子監生太學官親屬許不以鄉貫就開封應舉之法臣等看詳監以國子為名而無國子教養之實恐未稱朝廷建學育士之意乞應清要官親戚並令入監聽讀以二百人為額解發毋過四十人從之

哲宗元祐元年十月乙未有詔齊廬宿常虔穎同懷州各置教授一員○元祐元年十月癸丑劉摯言國子司業黃隱學不足以教人行不足以服衆又言故

相王安石訓經旨視諸儒義說得聖人之意為多故
先帝以其書立之於學以啓迪多士而安石晚年溺
於字說釋典是以近制禁學者毋習此二字而已至
其所頒經義蓋與先儒之說並行而兼存未嘗禁也
隱猥見安石政事多已更改輒爾妄意迎合傳意因
欲廢安石之學每見生員試卷引用隱輒排斥其說
○元祐元年十月癸丑呂陶言太學者教化之淵源
所以風勸四方而示之表則一有不令何以誨人黃

隱素寡問學薄於操行且經義之說蓋無古今新舊
惟貴其當先儒之傳注既未全是王氏之解亦未必
盡非隱亦能誦記安石新義推尊而信嚮之久矣一
旦聞朝廷欲議科舉則諷諭太學諸生凡程文字不
可復從王氏新義或引用者類多黜降諸生亦聞安
石之死而欲設齋致奠以伸師資之報者隱輒形忿
怒將繩以率斂之法此尤可鄙也○元祐元年十月
癸丑上官均言黃隱自官庠序將及一年考其行則

倨傲自任傾邪無常論其學則暗於經術不燭義理
興建三舍以來學規弛廢取舍失平未有如今日者
也願陛下博採公論早行罷免以副衆心訖不行
元祐二年七月丁巳詔內外學官遷年三十以上歷
任人充從御史中丞胡宗愈請也

學官自罷試多出近臣論薦宗愈言學者初中科
遽專師席請擇長才嘗歷任者充選

本傳

元祐五年十二月丙午岑象言近歲太學諸生無叩

問師資之益學官不以訓導為己任祕書省則多務燕閒少親讎校請立訓導之法定校讐之課及聞太學補試伺察不嚴有假手之弊詔令禮部祕書省長貳詳度以聞○元祐六年八月戊子朔知開封府范百祿轉對言三事其一曰太祖建隆元年正月是歲二月四年四月太宗端拱元年八月淳化五年十一月真宗咸平二年七月皆幸國子監仁宗天聖二年八月己卯幸國子監謁文宣王召從臣升講堂令直

講馬龜符說論語一篇賜龜符三品服伏望陛下詔
有司檢舉祖宗視學故事以待萬機之暇而賜臨觀
焉今所陳幸太學可以美文明之化○紹聖元年五
月辛亥詔內外學官非制科進士出身及上舍生入
官者並罷○紹聖元年五月甲寅三省言學官已立
試法耀洪吉饒潭夔利廣桂虔泉等州教授見係吏
部差人詔自今三省選差

徽宗崇寧三年十一月甲戌幸太學遂幸辟雍詔國

子司業吳綱蔣靜各進官一等面賜三品服博士正
錄滿三考改合入官未滿三考人循兩資學生鄭南
等十有六人授官餘免省試免文解恩賜有差

詔旨大觀二年正月一日有御製辟雍記今附此
崇寧元年八月二十二日甲戌議建外學十月十
七日戊辰初建辟雍御製辟雍記鄉舉里選之法
掃蕩而士累於科舉學不為己舍本趨末道聽塗
說以應有司之求僥倖一日行不考素賢愚雜揉

俾之從政不見大全鮮廉寡恥無不為已歷歲千
百有為之君雖絕俗高見其設施注措終不能髣
髴前古習尚卑陋市利之徒學非先王故也因誤
承陋久莫能革惟我神考稽若古昔訓釋經義興
置學校崇建師儒天下之士靡然向風始棄聲律
雕篆之技遊意於道德性命之理矣朕奉承先志
追而述之罷廢科舉增教導之官即國郊之南度
地相方建立黌舍因先王禮以制之樂以和之之

意命之曰辟雍外圓內方為屋一千八百七十二
楹以居天下貢士首善於京又潤色熙豐之成法
月書季考覈其行能待以歲月士無苟得苟失之
患推三舍法施於天下由外舍升於內舍內舍升
於上舍由縣之上升於州由州之上升於辟雍由
辟雍以登於太學司成率其屬稽其籍考其成升
其尤者命之以官三年大比策以當世之務別其
等差唱第於廷釋褐而任使之教養之政覃及蠻

貂絃歌之聲達於萬里父詔其子兄告其弟相率
以善曾不踰歲咸以行實聞於朝廷載在仕版已
踰千計非祖功宗德休養平治何以臻此昔鄭人
毀鄉校詩人序而刺之曰亂世則學校不修如今
天下被教養之惠凡一十一萬餘人為屋以居之
凡萬一千餘楹計其所費錢二百四十一萬餘貫
穀五十五萬餘石庠序之盛多士濟濟視古無愧
矣朕歷觀在昔教化成人倫明習俗美至於成人

有德小子有造蓋上有立道興教之辭下有忘利
守義之士維持固結卜世三十卜年八百其遺波
餘澤及於後世猶有存者則學校之數治道之首
垂世之法無以過也文王作周其詩曰於論鼓鐘
於樂辟雍武王能廣文王之聲其詩曰鎬京辟靡
自西自東自南自北無思不服蓋武王能廣文王
以善養人施之天下而天下服也朕克紹先烈於
今其庶幾乎大觀二年正月朔日記

長編

崇寧四年正月丁丑詔諸路州軍專置學事按差手
分一名從通判鄭州曹滋奏請也○崇寧四年正月
甲午江西提舉學事司言考上舍有地遠而學生少
者難於差官乞併撫筠建昌於洪虔袁南安臨江吉
試畢具合格人報逐州學叅定升貢從之○崇寧四
年始行三舍之法建辟雍之學又慮山林之士不能
月書季考以遊庠序於是又設科場○崇寧四年閏
二月乙酉詔辟雍以待四方貢士在國之郊太學教

養上舍生在王城之內內外既殊而高下未倫辟雍有司成在侍郎之次國子有祭酒司業列於卿少而已事體不順合行釐正改辟雍司成為太學司成總國子監及內外學事凡學之事皆許專達長編○宗

寧四年四月甲申增立辟雍國子監等官謁禁長編○

崇寧四年六月己卯詔在京釐務官本家有服異居大功以上觀聽充國子生見在太學者依此改正內曾隨侍入州學者通理月日從司成薛昂請也長編○

大觀元年二月乙丑御筆以學校三舍陞貢次第著
為令編通用令刪之首諸士自縣學教養陞之州學
州學教養分為三舍自外舍升為內舍自內舍升為
上舍自上舍貢之辟雍自辟雍登太學俟殿試命以
官長編○大觀元年三月甲辰詔有官人與貢士同試
合格者上等升二等差遣仍賜上舍出身文學優者
取旨推恩中等赴殿試長編○大觀元年六月癸酉御
崇政殿引見上舍生李邦彥等三十六人孝悌進士

三人賜上舍及第釋褐以邦彥為承事郎辟雍博士

長編○大觀元年閏十月乙未興三舍長編○大觀元年

十二月壬午御筆八行八刑之士所在皆得以名聞

不限在學不在學令學制局申明行下從提舉福建

路學事陳汝錫奏請也

長編

○大觀四年八月己卯詔

策士於庭諏以世務深惟神考盛德美意所宜遵承

比閱學制貢士入上等者引見釋褐止以有叅校而

不復庭策豈神考之志哉自今入上等者與中等並

留太學以俟殿試其上等人遇取名取音○政和三年四月甲申宣義郎黃冠言竊謂成周之時有所謂選士有所謂俊士有所謂造士先王之命名不同如此而後世則不論其人之成才與未成才不辨士之預貢與不預貢而均謂之秀才則名之不正可知矣欲令天下士自鄉而升之縣學自縣而升之州學則通謂之選士可也其稱則曰外舍生及其才向於成而升之內舍則謂之俊士其自稱則曰內舍生又其

才之已成而貢之辟雍然後謂之貢士焉其自稱也亦以是而已若然愚智處宜賢不肖襲情世之商賈工岐巫醫卜筮假進士之名而稱秀才者固不待禁而止矣從之長編○政和三年五月乙酉臣僚言陛下

著為舍法革千載科舉之弊進士固已罷去今賜承議郎徐裡進士出身顯於名實未正乞改賜同上舍出身從之長編○政和六年三月癸丑御崇政殿賜太

學上舍饒州臧瑀等十一人并宗子學及太醫學上

舍二十四人及第出身同出身並釋褐長編○政和六

年八月己巳臣僚言乞降德音詔中外師儒之官取

程較文藝大槩以熙豐為標準體制各隨所長務得

通經篤學之士黜浮偽剽竊之文庶得真材實能以

待朝廷之用詔割下太學國子監辟雍長編○政和七

年三月戊午賜進士永興軍景徽等一十三人上舍

及第出身釋褐長編○政和七年六月癸亥前提舉永

興路軍學事郭民瞻奏乞將外任官隨行親內舍生

遇所在州軍不係試上舍年即依單經人法於學事
司附試從之編○宣和三年二月乙酉詔罷天下三
舍太學以三舍考選開封府及諸路以科舉取士州
縣未行三舍以前應置學官及養士去處國子監太
學官吏並依元豐舊制辟雍官屬及宗學并諸路提
舉學事管勾文字官並罷長編○宣和三年三月辛酉
臣僚上言自三舍法行係籍學生並免差科以是兼
并上戶之家皆遣子弟入學非人人俊彥也徃徃以

厚科假手濫處庠序其中下之戶差科倍增老幼旁
午於州縣力不能給或至逃亡今舍法既罷乞不許
更免差科從之實錄○宣和四年三月辛酉幸太學酌

獻文宣王御敦化堂令國子祭酒韋壽隆講書無逸
司業權邦彥講詩下武百官諸生並賜茶又幸精微
造十二齋命開府儀同三司梁師成總領重葺齋舍
詔曰朕惟神宗皇帝稽古恢儒訓迪天下眷成周大
比之法實寓六卿迺闢成均肇行舍選褒制訂議積

年於茲陳紀立經是為可繼異時議者乃欲推廣茲意咸暨四方緝為繁文譸張迂闊而翫歲揭日終莫能行士困躓道塗牽攀較試仰事俯育咸拂其心致操行溺於囂浮藝文襲於剽○去古益遠朕甚憫之屬者祇紹詒謀一遵前烈惟克果斷自朕心適觀厥成萬世無斁爰飭庶役增建大成命駕來臨式示延佇爾其敏修厥德日就月將用副朕樂育之誠以章先帝洪業休德無窮之聞惟爾與焉亶茲在庭其體

至意御製宣聖贊曰厥初生民自天有造百世之師
立人之道有彛布倫垂世設教爰集大成千古允蹈
乃嚴斯學乃新斯宮瞻彼德容云孰不宗詔國子祭
酒韋壽隆為給事中秘書少監翁彥深為國子祭酒
國子司業詹又為中書舍人權邦彥為左司員外郎
學官增秩一等三舍生釋褐免省試免解賜帛有差
學生孔端朝先聖四十八代孫賜上舍

長編

高宗紹興十二年十一月辛卯初言者屢請復太學

以養人材上以戎事未暇至是上謂宰執曰太學教化之原宜復祖宗舊法程克俊曰東晉設學於鼎沸之中今兵息矣興學正其時也秦檜曰久有此議今當舉行之○紹興十二年十一月己亥始詔立太學養士既而合權以三百人為額仍復置祭酒司業博士正錄等官○紹興十二年十二月辛未上曰太學師儒之官雖選經術當先德行要使士子化之以厚風俗○紹興十三年七月壬申時國學新成補試生

員四方來者甚衆幾六千人丙子揭榜取徐驥等三

百人

中興紀事

○紹興十三年九月戊辰知建昌軍李長

民言軍興以來學政中輟今和議既成儒風復振郡邑長貳宜兼學事以示偃武修文之意詔從之○紹

興十三年十月己丑侍御史李文會論新除國子監

丞石安慶輕儇無行丁酉上曰太學風化之本使此

人充監官何以取重於士人詔即罷之

並中興紀事

○紹

興十三年十一月戊午時上所寫六經與論語孟子

之書皆畢檜因請刊石於國子監仍頒墨本賜諸路

州學詔可○紹興十三年十二月辛卯新知永州熊

彥詩上言欲依嘉祐治平故事補中監學生命祠給

綾紙從之

並中興紀事

○紹興十三年十二月癸巳上謂

宰執曰學校者人才所自出人才須素養太宗置三

館養天下之士至仁廟人才輩出為用秦檜曰國朝

崇儒重道變故以來士人雖陷敵者往往能守節乃

教育之效也上曰然五代之季學校不修故無名節

今日若不興學校將來安得人才可用耶○紹興十

四年二月庚辰詔太學養士三百人太少宜更增二

百人

並興
紀事

○紹興十五年三月戊寅上謂宰執曰

朕觀古之太學有養士至二三千亦朝廷一盛事乃

詔添養士一百人○紹興十六年正月戊寅時太學

養士已七百人 戊子詔增為一千人○紹興十六

年太學之初興也春補就試者五千人遂分數場有

改名冒試至再三者秋七月辛未中丞何若言今秋

補人數又多乞於貢院引試上曰士人進取之弊一至於此所係甚大不可不革今日之所養則他日之所為可見也○紹興二十二年時有贍學公田多為權勢所占九月戊戌上謂宰執曰緣不度僧常住多有絕產令戶部撥以贍學○紹興二十六年三月壬子進呈太學生員稀少欲令禮部措置上曰學校人材所自出元祐間名臣最多實仁宗養育之有素也近來學校雖設而教育未至每以人材難得為患可

如所奏令有司條具以聞

臣等曰學校以教之王政之本也樂育人材菁莪之義也士不素養而求一旦之用猶兵不素練而責其一日之戰也太上皇帝興太學以養天下之士慮其未廣又下增員之令譬之嘉穀種之力者獲必豐養之至矣才難何慮哉聖政

紹興三十二年十一月甲午殿中侍御史張震奏論國子監已減正錄二員不宜復置上曰館職學官祖

宗設此儲養人材朕欲待方來之秀不可定員聖政○

孝宗淳熙四年正月丙寅輔臣進呈紹興十四年幸學詔上曰今所降詔大意欲以崇尚風化勸厲諸生使知所趨向朕得詔中兩語當為君子之儒毋慕人爵之得龔茂良等奏大哉王言誠得體要當以聖語諭學士令載之詔書上可之上宣諭輔臣曰諸生有兩經幸學人宜並與補官龔茂良等奏前此該慶壽恩補官者聞可數人年老離學遂無所歸上曰如此

尤可憫於是詔作該慶壽赦太學生七十已補官人
如願在學者聽聖政○自此以後皆州縣學

徽宗崇寧二年五月癸卯詔廣州漳州各添置教授

一員長編○崇寧二年六月丙辰詔縣學生不及二

人處計依州學例并附近大縣一處教養長編○崇寧

二年六月辛未給諸州州學印長編○崇寧二年八月

辛亥詔諸路縣學生見及一百五十人以上即以五

十人為額以下即以四十人為額長編○崇寧二年十

二月庚戌許諸州立學仍賜以國子監書從熙河都轉運司請也長編○崇寧三年正月己丑詔諸路增縣

學子弟員大縣五十人中縣四十人小縣三十人長編

○崇寧三年正月癸巳中書省勘會天下已置學養士士在學校月書歲攷行藝純備方與入貢其選頗艱而科舉取一日之長人樂僥倖衆易以趨故異意與怠惰之人多憚於入學甚失朝廷教養之意詔五路學生在學一年方許取應餘路在學半年仍通縣

學月日即取應人衆而學校所養數少雖令在學半年其不在學之人尚多者仰學事司較量相度聞奏

長編○崇寧三年四月辛亥詔府界諸路提舉學事司

契勘逐縣粮如有餘剩即許額外增養學生長編○崇

寧三年六月丙午江東路提舉學士司言諸州皆已

置學唯廣德軍附宣州今學者漸多乞自置學從之

仍詔諸路州軍未曾置學處並置學○崇寧三年六

月丁未詔諸州戶絕田並充贍學不許出賣從提舉

開封府常平事李晰等請也

長編

○崇寧四年正月戊

戌詔諸州學生增養及三百人以上置教授二員從

權發遣蜀州張宗武奏請也○崇寧四年閏二月丁

丑詔應州縣學職事人並先選州學三舍生補充其

特奏名進士曾在太學試中上內舍者許依條差所

有見充職事特奏名人如不曾在太學試中上內舍

即罷

長編

○崇寧四年三月壬子賜辟雍手詔許令諸

州學立石從新提舉廣南東路常平陳杞奏請也

長編

○崇寧四年八月戊辰給事中鄭居中言諸州學士百人立上舍額五人即是學生二十人合補上舍一人今乞餘分五人已上者更取一人從之編長○大觀

元年五月戊戌學制局奏開封府申乞立府學貢士額今取到禮部狀開封府解額二百人崇寧分撥下項三十人留充土著人解額二十人入國子監充諸縣學生升國學解額餘人撥充諸州貢額又辟雍供到開封府學生二百九十三人一百六十三人諸縣

歲升學生一百三人府學生一十三人直學所會到
畿縣升到有校定學生臣等看詳辟雍供到即日開
封府學生并諸縣歲升學生止共有二百九十三人
今若依已留土著三十人并撥入國子監充諸縣學
生升國學解額共五十人立為貢士定額即慮太多
今欲以實在府學生每十人聽貢一人零數亦貢一
人至五十人止不足者闕之詔王畿庠序初建學者
未廣若不立寬額以俟來者則人無向進之意可以

五十人為定額長編○大觀元年六月庚午御筆令諸

州學以御製八行長編○大觀二年五月庚戌提舉京

西南路學事路瑤言臣所領八州三十餘縣比諸路

最為褊小管學舍乃至二千三百餘區教養生徒三

千二百餘人贍學田業等歲收錢斛六萬三千餘貫

石竊計諸學舍生徒田業錢斛之數何翅數百萬此

曠古所未有也乞詔有總會諸路州縣文武大小學

生并學費所入所用實數具成圖冊上之御府副在

辟雍仍宣付史館從之長編○大觀二年七月二十一

日常州奉行學校推恩御筆手詔

詔曰學校興崇人材樂育法備令具勸懲已行深
慮有司失實尚有遺材傳不云乎進賢受上賞蔽
賢蒙顯戮閱前日賓興之數較其試中多寡惟常
州為衆苟依常格推恩非古人上賞之意其知州
教授特各轉一官

大詔令

大觀二年八月二十二日京西南路提舉路瑤奏乞

學費所入所用載之圖籍御筆

禮部掌教養之事學校之興內外協力今已就緒而養士之類舍宇之數費用之多寡田業之頃畝載之圖籍掌在有司累年於茲廢闕不具失職為甚可依所奏疾速施行

大詔令

大觀二年九月乙丑詔諸路州學有閣藏書皆以經史為名方今舉八行以迪多士尊六經以黜百家更何足言應已置閣處可賜名曰稽古

長編

○政和二年

五月丁卯新提舉秦鳳等路學士許穀言大觀新修諸路州縣學勅令頒行六年於茲諸路申明上煩訓諭教告者不可悉數乞詔有司特加省詳擇其可使通知鏤板頒行使良法美意人人易曉又乞以屏斥林伯達責降蔡幾等事鏤板布之天下並從之

長編

政和三年五月十六日學校御筆

鄉舉里選三代所以賓興賢能以善養人者也今學校之興教養之令修明備具矣比來浸失本旨

至參以科舉罷廢縣學給食之法害令惑衆者非
一可並依大觀三年四月以前指揮其後降指揮

更不施行

大詔令

政和五年八月十一日學校增員御筆

學校以善養人設師儒建黉宇備膳羞教天下士
十有三年道日益明士日益衆庶幾於古養士之
額尚循前數有司拘以定額士游學校外不被教
養於學者尚多有之則野有遺材矣諸路學校額

及百人以上者三分增一分百人以下增一分之
半即陝西河北河東京東路學生數少者仰提舉
學事司具可與不可增及所增數聞奏

大詔令

小學

徽宗大觀二年正月三十日鄉村城市教導童稚令
試義御筆

古者命之教然後學比聞上書及黨人聚徒立衆
教以邪說所習非正違理悖義其能一道德同風

俗乎除士子並合八所在學外自今應於鄉村城市教導童稚令經州縣自陳赴所在學試義一道文理不背義理者聽之上書及黨人不在此限違者以違制論

大詔令

政和四年二月己酉中書省言小學生已及千人貢士教諭止十人恐不能總領兼未有勸沮之法欲分為十齋增與月給俸錢兩貫不許受束脩從之○政和四年十一月壬辰國子博士李邁言伏覩三舍造

士肇自神考成於陛下邇者小學生樂就長育人材之本實始於此臣竊謂教化之行自內及外則此法不獨可施於首善之地固宜推而廣之使州郡小學

遵倣新令分為三舍庶幾內外均一從之

並長編



羣書考索後集卷二十七

欽定四庫全書

子部

羣書考索後集卷二十八

九

詳校官中書臣寶汝翼

主事臣祁韻士覆勘

總校官知縣臣楊懋珩

校對官中書臣徐夔雲

謄錄監生臣官懋斌

欽定四庫全書

羣書考索後集卷二十八

宋 章如愚 編

士門

學法類

三舍附

真宗祥符七年八月辛巳詔國子監學生應子弟在
監習業者除實是開封府外每人召京朝官二人為保
識然後收試其保官須具印狀赴監

長編

仁宗慶歷三年二月辛酉國子監言自今補說書官請以四人為定額及歲所試監生不合格且留聽讀三試不中者黜之仍請立四門學士以庶人子弟為生員以廣招賢之路並從之

長編

神宗熙寧四年十月戊辰中書言近制增廣太學益置生員除主判官外直講以十員為額每二員共講一經委中書選差或主判官奏舉其生員分三等以初入學生員為外舍不限員自外舍升內舍內舍升

上舍上舍以一百員內舍以二百員為限生員各治
一經從所隸官講授主判官直講月考試優等舉業
上中書學正學錄學諭於上舍人內逐經選六員如
學行卓然尤異者委主判及直講保明中書考察取
旨除官具有職事者受官訖仍舊管勾候直講教授
有闕次第選充其主判官直講職事生員並第增給
食錢從之長編○熙寧六年三月庚戌上言學校法終
當革王安石曰此餘事恐久遠須立法命知制誥呂

惠卿兼修撰國子監經義太子中允崇政殿說書王
雱兼同修撰先是上諭執政曰今歲南省所取多知
名舉人士皆趨義理之學極為美事王安石曰民未
知義則未可用况士大夫乎上曰舉人對策多欲朝
廷早修經義使義理歸一乃命惠卿及雱而安石以
判國子監沈季長親嫌故辭雱命上弗許已而又命
安石提舉安石又辭亦弗許長編○元豐二年十二月
乙巳御史中丞李定等言切以取士兼察行藝則是

古者鄉里之選蓋義可以一日而校行則非歷歲月不可考今酌周官書考賓興之意為太學三舍選察升補之法上國子監敕式令并學令凡百四十條詔行之初太學生檀宗益上書言太學教養之策有七一尊講官二重正錄三正三舍四擇長諭五增小學六嚴賞罰七設司業上覽其言以為可行命定與畢仲衍蔡京范鎰張瑄同立法至是上之太學置齋舍八十齋容三十人外舍生二千內舍生二百上舍生

一百總二千四百生員入學本貫若所在州給文據
試而後入月一私試歲一公試補內舍生間歲又一
試補上舍生封彌謄錄如貢舉法而上舍則學官不
與考校諸齋月書學生行藝以帥教不戾規矩為行
治經程文合格為藝齋長諭學錄學正直講主判官
以次考察籍記公試外舍生入第一第二等參以所
書行藝預籍者升內舍內舍生試入優平二等參以
行藝升上舍分三等俱優為上一優一平為中俱平

若一優一否為下上等命以官中等免禮部試下等
免解以升補人行藝進退計人數多寡為學官之賞
罰緣升舍為姦者論如違制律不用去官赦原學正
增為五人學錄增為十人學錄參以學生為之長編○
元豐三年二月辛丑詔國子監罷書庫官復置主簿
增監廚使臣各一員增歲賜公使錢并舊為千緡太
學正錄二年為任通計六考聽改官三考與循資并
增巡宿剩貢并舊為二百人並從看詳學制所請也

元豐四年七月己酉國子監言學生入學乞同縣五人以上為保如犯第一等罰不覺舉者與罪許人告賞錢三百千未入學以前違礙亦準貢舉法從之○

哲宗元祐元年五月戊午王巖叟言太學條制本學生徒須在學聽讀一年方許於太學應舉臣伏見特降但曾經補中監生人並許應舉詔國子監立法請今次科場應自元豐三年興學以來在學前後通及一年者並許取應從之

並長編

○元祐元年五月戊辰

詔孫覺固臨程頤同國子監長貳看詳立國子監太

學條制

長編

○元祐元年秋七月丙辰朔尚書省言舊

制中外學官並試補近詔尚書侍郎左右司郎中學
士待制兩省御史臺官國子司業各舉二員宜罷試
法先是王巖叟言內自太學外至諸郡學官之制皆
令就試四方之士區區於進卷屑屑於程文不憚奔
馳豈其心哉祿仕迫之有不得已耳伏望聖慈令罷
此法一用應詔薦舉之士為中外學官以重教導之

選武學學官亦乞依此罷試於是從嚴叟之言也

長編

○元祐元年冬十月癸丑劉摯言太學條制獨可按據舊條考其乖戾太甚者刪去之若乃高濶以慕古新奇以變常非徒無補而又有害夫職親於諸生而習知其情偽者宜莫如學官也使其因人情利害而為之法者亦莫如學官也然則安用以他官置局為哉欲望聖慈指揮罷修定學制所止以其事責在學官正錄以上將見行修制去留修定嚴立近限次第

條上取旨施行所貴因革不失其當法令速成以便
學者以述先帝興學之旨以副陛下之意摯言高濶
以慕古新奇以變常蓋指程頤也頤所立條制輒為
禮部疏駁頤亦自辯理然朝廷訖不行長編○元祐六

年九月戊子禮部臣僚上言國子監今欲令生員遇
有請益許見長貳逐旬遇三日學諭出題內試賦論
許於經史子集通出長諭解脫歸齋生諭諸生次日
早食前仍納旬終送博士點檢仍間召生員以所納

齋課於講堂上指諭委博士逐月遍巡所隸齋詢考
學生所業凡私試不鎖宿欲令不罷講說從之長編○

元祐八年三月庚子中書省言進士御試答策多係
在外準備之文工拙不甚相遠難於考較祖宗舊制
御試進士賦詩論三題施行已遠前後得人不少况
今朝廷見行文字多係聲律對偶非學問該洽不能
成章若不復行祖宗三題舊法者未知朝廷所向取
到國子監狀太學見管生員二千一百七十五人內

二千九十三人習詩賦八十二人習經義不兼詩賦
以此可見中外學者習詩賦人數極多詔來年御試
將詩賦舉人復試三題經義舉人且令試策此後全
試三題長編○紹聖二年二月戊辰國子司業龔原等
言太學公試除依元豐舊例差長貳監試輪差博士
五員入院外乞朝廷差官五員共十員入院同共考
檢從之壬午國子司業龔原等言太學更乞不置掌
儀添直學依元豐舊令置學諭二十人從之長編○紹

聖三年十二月甲戌翰林學士承旨詳定國子監條
制蔡京言奉敕詳定國子監三學并外州軍學制今
條成太學敕令式二十三冊以紹聖新修為名詔以
來年正月一日頒行長編○元符二年十一月詔諸州
置教授者學生依太學三舍法考選外補內上舍生
每歲貢一人內舍生每歲貢二人上舍生限當年十
二月到京隨太學補試合格與充內舍生不合格許
再試三經試不中者遣還內舍生不候試與充外舍

諸路貢上舍生到京並權破外舍生食諸路合選監
司一員提舉學校仍令通知專一官勾諸州試內舍
上舍並監司選差有出身官一員與校官同考試仍
封彌謄錄合用條貫今於國子監取索行下其外州
不可行者比類條具申尚書省

長編

徽宗崇寧元年八月甲戌右僕射蔡京請以學為今
日先務乞天下並置學養士如允所請乞先次施行
一乞罷開封府解額除量留五十人充開封府土

著人取應外餘並改充天下貢士之數所有諸州單額各取三分之一添充貢士額一乞天下並置學養士郡小或應舉人少則令二三州學者聚學於一州一乞置州學並差教授二員一乞增置田產養士應本路常平戶絕田土物業契勘合用數撥充如不足以諸色係省官田宅物業補足一乞以三舍考選法遍行天下聽每三年貢入太學上舍試仍別為號分為三等若試中上等補充太學

上舍試中中等補充下等試中下等者補充內舍
餘為外舍生雖補不及中下等或不及等及科舉
遺逸而學行為鄉里所服委知州通判監司依貢
士法貢入委祭酒司業博士詢考得實當議量材
錄用一乞令郡守監司保任貢士若貢士到太學
試中上等及考選升舍人多即等第立法推賞一
乞諸縣置學於本縣委令佐擘畫地利及不係省
雜收錢內椿充費用一乞學生自縣學考選升州

學一乞州縣並置小學一乞立學生在學升黜法
一乞外任官子弟許入學取應在外官子弟親戚
法不合在本處取應者許隨處入學即不得升補
為貢在學甫及一年給公據許赴太學取應國子
監解名一乞州學職掌學諭教諭學長許差特奏
名人一乞禁不得教學生非經史子書文字詔令
講議司立法頒降仍差將作少監李誠於城南門
外踏逐修置外學

長編

崇寧元年八月二十二日甲戌興學校詔

詔曰學校崇則德義著德義著則風俗淳故教養
人材為治世之急務除京師置外學待其歲考升
之太學已嘗面諭外餘並依所陳蔡京所請仍講
議司立法頒付禮部施行

大詔令

崇寧元年十月戊辰宰臣蔡京奏竊以周制大司樂
掌成均之法以治建國之學政而王國之外則黨有
庠遂有序卿大夫由是以興賢能焉故王制述四代

之學亦曰周人養國老於東膠養庶老於虞庠虞庠
在國之西郊先儒謂四代之學或上西或上東或貴
在國或貴在郊其制不一要之内外皆有學也賈誼
按大戴禮以謂禮有五學蓋本諸此歷代唯唐貞觀
間四夷皆遣子弟入學國子監三學之士至八千人
神宗皇帝元豐二年始立太學立三舍分命師儒以
教養天下之士蓋有志於成周之賓興賢能也臣面
奉德音詔天下皆興學貢士仍建外學於王國之南

待其歲考行藝升之太學悉出陛下聖意合於先王建學之制而仰紹神宗皇帝之遺訓天下幸甚今具外學條件如左

一國子祭酒總治外學事今來既設外學其官屬欲增損欲依下項人數立定員數緣太學生將來減少撥入外學內外分為兩學亦須量增官員今欲太學博士十二員減六員爲外學博士增四員通作十員太學正錄各五員今欲減二員入外學

各增三員通餘五員其餘職事人亦倣此增減外
學官屬司業一人丞一人博士十人學正五人學
錄五人職事人係學生充學諭十人直學二人齋
長每齋一人齋諭每齋一人外舍生三千人一太
學上舍一百人內舍三百人今諸路貢士既多則
上舍內舍難拘舊額欲候將來貢試到合格人即
增上舍作二百人內舍作六百人處上舍於太學
處外舍於外學一外學置齋一百講堂四每齋五

間三十人一太學自訟齋以待學生之不率教者
令移於外學別置一外學生諸路貢到並入外學
候依法考選校試合格升之太學為上舍內舍生
一見今太學外舍生且令依舊法在太學候將來
外學成日別取指揮一外學並依太學敕令格式
施行從之外學尋賜名辟雍

長編

崇寧三年十一月丁亥詔曰惟昔神考嘗議以三舍
取士而罷州郡科舉之令其法始於畿甸而未及行

於郡國肆朕纂圖制詔有司講議其方成書來上悉
推行之設辟雍於國郊以待士之升貢者禮文咸舉
制度大畧乃擇日謁欵先聖臨幸黉舍延見諸生擇
其當論選者而官之增秩博士加恩子弟朕所以勸
勵學者可謂至矣然今州郡猶以科舉取士而學校
之法不得專行故士心所嚮未一豈朕之意哉其詔
天下除將來科場如故外並罷州軍發解及省試法
其取士並繇學校升貢庶幾洽往古作人之隆紹先

帝造士之美以稱朕圖治之意長編○崇寧四年正月

乙未詔應入自訟齋進士及一年令太學勘會不犯

第一等罰從本州給公據許入太學及本鄉取應長編

○崇寧四年正月丙申尚書省言諸路州學升補上

舍不得過三分內舍不得過二分慮法行之初升貢

數少詔今歲權不以分數據闕額升補長編○崇寧四

年閏二月庚午提舉開封府界學事路瑗言朝廷立

法增養小學生每人日供一食其所費錢乞以太學

生減半又言已補試在學生當免身丁其請假除籍之人依舊應役並從之

長編

○崇寧四年閏二月辛未

詔應諸路州學據學糧餘數額外增養學生並依額

內人條施行其崇寧三年三月二十三日所降遇額

內有闕即與縣學升補之人隔間補填指揮勿行

長編

○崇寧四年三月戊戌詔應學生試補已入學經試

能終場免身丁自外舍升內舍免本戶役升上舍免

本戶役外仍免諸般役借其應舉得免丁人自依舊

長編○崇寧四年四月壬子詔諸州縣學生試補入學

經試終場及自外舍升內舍者免身丁內舍仍免役
借升上舍即依官戶法其三月八日指揮勿行○崇
寧五年七月甲辰詔已降指揮舉行學制比閱前後
法令猶有未備慮失士心或因而煩擾有害學政可
依下項

一天下學士既令歲貢將來入貢其數必多所有
辟雍並令舊制仍依崇寧四年十二月已前指揮

施行一退送學生既展一年俟之不為不久待之
不為不盡比覽科舉舊法有因赦理舉許特奏名
推恩之法學生貢至辟雍三試退送之人所以患
無歸學生貢至辟雍試不中并退送者並與理為
到省舉數依例施行一州縣設學養士訪聞州縣
官吏并頑猾並緣為姦下行收買飲食什物減刻
侵欺騷擾人戶難與供辦細民受弊又人少學費
有餘豐腴過甚人多不足則菲薄草具甚非教養

均一之義緣學事輒科配率斂及下行買賣者徒
二年吏人公人配千里因而乞取賍輕者準此其
飲食仰學制所取太學見行法令酌中修立聞奏

長編

崇寧五年八月乙酉詔學校升貢之法雖有崇寧四
年指揮朕朝夕省閱未至詳盡理當增損諸州學以
中格上舍生每歲入貢仍以解額均為三分每歲貢
一分有餘分者第三年入貢即人不足者闕之太學

試上舍生以與三年科舉相妨故二年一試今旣罷
科舉而每歲一貢其一年一試州學上舍生每歲春
試秋下入貢限年終至辟雍路遠者季首發遣川廣
福建貢士給借職券二千里以上給大將券並以學
錢充天下置學教養多士考其行藝以復里選由縣
升州不當復立補入州學之法容其雜進五路解額
可以歲貢餘分撥一分貢武士周制三年大比今以
三年殿試不失成周之意然試中上等及鄉里孝悌

之人使俟三年慮成淹滯可即推恩引赴殿前釋褐

餘留太學以俟三年殿試

長編

○大觀元年三月甲辰

詔曰學以善風俗明人倫而人材所自出也今有教養之法而未有善俗明倫之制殆未足以兼明天下朕考成周之隆賓興萬民以六德六行否則威之以不孝不悌之刑比已立法保任孝悌睦婣任恤忠和之士去古綿邈士非里選習尚科舉不孝不悌有時而容故任官臨政趨利犯義詆訕貪污無不為者此

官非其人士不素養故也近因餘暇稽周官之書制為法度頒之學校明倫善俗庶幾於古

一諸士有善父母為孝善兄弟為悌善內親為睦善外親為婣信於朋友為任仁於州里為恤知君臣之義為忠達義利之分為和一諸士有孝悌睦婣任恤忠和八行見於事狀著於鄉里者耆鄰保伍以行實申縣縣令佐審察延入縣學考驗不虛保明申州如令一諸八行孝悌忠和為上睦親為

中任恤為下有全備八行保明如令不以時隨奏
貢入太學免試為太學上舍司成以下引問考驗
較定不誣申尚書省取旨釋褐命官優加擢用一
諸士有全備上四行或不全一行而兼中等二行
為州學上舍上等之選不全上二行而兼中等一
行或不全上三行而兼中二行者為上舍中等之
選不全上三行而兼中等一行或兼下一行者為
上舍下等之選全有中二行或中等一行而兼下

一行者為內舍之選餘為外舍之選一諸士以八
行中三舍之選者上舍貢入內舍在州學半年不
犯第二等罰升為內舍仍準上舍法一諸士以八
行中上舍選而被貢入太學者上等在學半年不
犯第三等罰司成已下考驗行實聞奏依太學貢
士釋褐法取旨推恩中者依太學上等法待殿試
推恩下等依太學中等法一諸士以八行中選在
州縣若太學皆免試補為諸生之首選充職事及

諸齋長諭以八行考士為上舍上等其家依官戶
法中下等免戶下支移折變借身丁內舍免支移
身丁一諸謀反謀叛謀大逆子孫同及大不恭詆
訕家廟指斥乘輿為不忠之刑惡逆詛罵告言祖
父母父母別籍異財供養有闕居喪作樂自娶釋
服匿哀為不孝之刑不恭其兄不友其弟姊妹叔
嫂相犯罪杖為不悌之刑殺人畧財放火強姦盜
若竊盜杖及不道為不和之刑謀殺及賣掠總麻

已上親毆告大功以上尊長小功尊屬若內亂為
不睦之刑詛罵告言外祖父母與外姻有服親同
母異父親若妻之尊屬相犯至徒違律為婚停妻
娶妻若無罪出妻為不婣之刑毆受業師犯同學
友至徒應相隱而輒告言為不任之刑詐欺取財
罪杖告囑者鄰保伍有所規求避免或告事不干
已為不恤之刑一諸犯八刑縣令佐州知通以其
事目書於籍報學應有入學不睦十年不婣八年

不任五年不恤三年能改過自新不犯罪而有二行之實者鄰保伍申縣縣令佐審聽入學在學一年又不犯第三等罰聽齒於諸生之列

長編

大觀元年五月

缺

日罷提舉河北東路學事葉常御

筆手詔

詔曰稽古驗今作人造士比建庠序親製法令有能中選每歲釋褐命官不俟三年之淹可謂不次之舉八行異能之士不試而貢由鄉以升州由州

以申朝非次拔用可謂非常之舉常身為提舉學事官乃不知此方進劄子乞立傑然在人上之法欲加升進法既不能詳考其能舉職以教多士乎可罷提舉學事司別為差遣

大詔令

大觀三年四月壬日知樞密院事鄭居中等上大觀重修國子監太學辟雍并小學敕令格式總四十八冊設改正十三條餘悉詔行之詔旨○大觀四年八月戊寅詔學校之法頒之天下奉行之初設官屬厚餼

廩所以勸趨向及今累年頗見就緒其間事貴經久
理須裁適博士太學五員國子五員辟雍十員國子
令太學兼領辟雍省五員命官正錄太學各三員辟
雍各五員太學省命官學錄一員辟雍省二員國子
命官正錄各二員三省又省辟雍命官直學又辟雍
巡檢一員兵士百人又省國子監崇寧二年所增監
庫官辟雍所增亦省公廚使臣一員依紹聖格存留
二員省崇寧四年所增一員縣學並州縣小學生更

不給食依元豐例願陪廚者聽川廣福建並二千里
已上貢士給券條令勿行多士悉由鄉貢慮有遺逸
自今取貢額三分於大比前一年解發不入學及雖
入學而見係退黜者方得取應仍別作一項貢士院
即令同考校太學辟雍月試依紹聖格更不謄錄諸
路所貢士試上舍以合格者取十人為上等四十人
為中等五十人為下等補武學內舍逐等合格人不
足者聽闕餘不入等並充武學外舍生武學監廚官

令國子監公廚官兼管司計止差學生仍令禮部取

內外學制將衝改事件參定取旨頒降

長編

○政和元

年十二月丙辰鄭居中奏學法一百三十卷御筆裁

成者列於卷首乞冠以政和所修為名仍乞付國子

監頒降從之

長編

○政和三年三月辛卯淮南東路提

舉常平徐旼言欲望應蔭補入官人須在學及一年

不犯第三等罰方許就銓試內兩試入等者與免試

預公私第一名者特為比類銓試推恩庶幾一命之

上皆陶陛下教養異時從政必能以所學措諸事業
不獨為簿書獄訟之習而已詔令尚書省立法施行
詔旨○宣和三年六月庚申尚書省言學校養士以
待天下賢能可以作人材敦士行興教化自縣學升
之州自州升之辟雍升之太學然後命官則縣學為
升貢之本令天下佐吏部注授多非其人俗吏則以
學為不愆不加察治縱其犯法庸吏則廢法容奸漫
不加省有罪不治以故學生近來在學毆鬪爭訟至

或殺人蓋令佐不加治訓州縣不切舉察提舉官失於提按以致如此不惟士失其行亦官廢其職今具下項

一州縣學生有犯在學杖以下從學規徒以上若在外有犯並依法斷罪一州縣學生有犯教授令佐職事人不糾舉與同罪知運失按減一等提舉官又減一等若故縱並加一等欲令轉運提舉司契勘諸縣官對移上內舍登科人隨資序到任二年

以下人充令佐於學事司錢內支食錢三貫如不
是吏部注人替滿兩考人其被替人理一任減一

考改官詔依

長編

政和三年七月癸巳臣僚言學生非實有真才而至
師長位因而有所干請者乞嚴行糾舉冒濫恩愛重
不副教養期待之意詔有犯依學規科犯論罰同上○

政和五年三月壬辰臣僚上言伏乞陛下留神學校
度越前古創法立制纖悉備具而八行條目減資審

詔四方萬里當官者仰承德意守法不渝乃為稱職
苟或觀望畏縮廢格不行則誅罰之科殆不可廢御
製學法內一項諸以八行中三舍之選者上舍貢入
內舍在州學半年不犯第二等罰升為上舍一年不
犯第三等以上罰升為內舍仍準上舍法法意昭明可
循可守諸路士人有能中選者學司州郡自當遵奉
詔條考察升貢然臣訪聞福州學生有大觀二年已
保任行實補於內外舍至今在學首末八年而不升

舍者臣嘗詢考其故蓋緣遠方當職官違慢有素又以中遭紛更阻抑學校故本路一面違法不行至今使人人所存如此則陛下親製成法果何賴焉臣愚伏望聖慈特降睿旨委不干碍官體究俟見實狀其前後違法官並乞重賜黜責貴使學法悉行中外悚畏不勝幸甚詔令本州具析不升舍因依申尚書省

同上○政和七年八月庚午御筆國子有官人限以入

學一年方許參選此法也今身不在學而以假告理

年是為廢法自今除月給及依令給假外並不理為
在學月日特給假仍補填在京委太學在外委本州
當官保明關申吏部如違犯人屏出學滿三年方許
再入保明失實者以上書詐不實論○重和元年四
月丙辰蔡京等言取大觀元年以後至政和六年六
月以前應緣諸路學制續降指揮編修成敕令格式
總一百七十三冊乞以政和續編諸路州縣學制為
名與大觀學制兼行上同○高宗紹興十三年二月已

卯先是國子司業高閎言陛下復興太學凡養士取士之法當取聖裁上曰自有祖宗成法閎曰有慶歷元豐紹聖崇寧法有司未知適從若出於聖裁則行之乃久閎又奏舊太學辟雍皆有御書今亦乞建閣以藏御書仍願特洒宸翰加惠多士上許之閎又奏有一事最先經術是也上曰經不易通士習詩賦已久遽能使之通經乎閎曰先王設太學之意惟講經術而已上曰近侍讀官程瑀亦論經術閎曰國初猶

循唐制用詩賦神宗始以經術造士遂罷詩賦又慮
不足以盡人材乃設詞學一科試以雜文上曰詩賦
亦雜文也閑曰取士以經義為主不過三場後加詩
賦為四場不能無礙蓋太學之法旬有課月一周之
月有試季一周之若加一場則課試之法遂紊自元
祐以來雖增為四場終不可行者蓋以此也今欲經
義第一詩賦第二論策各一第三上可之庚辰閑具
分三場乞永為定式時閑又請在學人定三年歸省

之限詔可上曰舊有九年之法徽廟方改作三年豈
有士人九年而不省其親者乎長編○紹興十三年九

月戊辰司業高閌因經筵講畢奏曰國子落成臣奉
詔試補諸生幾六千人自中興已來雖二年省闈亦
未有如此之盛上曰乍脫干戈人皆向學此誠可喜
閌曰近來場屋不無懷挾假授之弊前日頓革皆不
可犯上曰朕亦聞之此美事閌曰臣待罪學官見此
美事諸生以為陞下方偃武修文與太祖初定天下

之時同符趣舉建隆故事願陛下講臨雍之禮言未
畢上曰已令討論矣蓋是時上已有幸學之意閱未
知之也先是閱請修監舉法以元豐為主詔令敕令

所參修至是成

中興
紀事

羣書考索後集卷二十八

欽定四庫全書

羣書考索後集卷二十九

宋 章如愚 編

士門

國子監解額

宋朝仁宗天聖元年冬十月癸亥增國子監進士解

額二十人

長編

○天聖七年八月甲午詔國子監進士

自今以五十人為額

長編

○慶歷元年八月癸巳詔國

子監今歲解發進士諸科各特增二十人

長編

○慶歷

四年十一月戊午朔判國子監余靖言臣伏見先降
敕命并貢舉條制國子監生徒聽讀滿五百日方許
取應每十人之中與解三人其諸路州軍府監並各
立學及置縣學本貫人並以入學所習三百日舊得
解人百日已上方許取應後來雖有敕命曾到省舉
人與免聽讀內新人顯有事故給假並與勘會除破
其如令非畫一難以久行竊以國家興建學校所以

育俊秀而訓導之由是廣學宮頒學田使其專心道
義以思入官之術伏緣朝廷所賜莊園房錢等贍之
有限而來者無窮若徧加廩給則支費不充若自營
口腹則貧窶者衆日有定數不敢不來非其本心同
於驅役古之勸學初不如此臣以為廣黌舍所以待
有志之士去日限所以寬食貧之人國家有厲賢之
風寒士得帶經之便欲乞應國子監太學生徒如有
情願聽讀滿五百日即依先降敕命將來取解十人

之中與解三人其不滿五百日者並依舊額取解應
舉所有開封府及天下州軍立州學處亦取情願聽
讀更不限以日數所貴寒士營生務學不失其所乃
詔罷天下學生員聽讀日限長編○慶歷四年十二月

戊戌詔自今解發進士太學以五百人開封府以百
人為額舊制開封府三百三十五人國子監百六十
人熙寧八年合為一以解額通取至是復分而太學
生數多故省開封解額以益之長編○皇祐五年七月

戊子又詔開封府國子監進士自今每一百人解十
五人其試官親嫌令府監互相送若兩處俱有親嫌

即送別頭

長編

○嘉祐三年五月壬申官勾國子監吳

中復言舊制每遇科場即補試廣文館監生近詔間
歲貢舉須前一年補試比至科場多就京師私買監
牒易名就試及旋冒畿內戶貫以圖進取非所以待
遠方孤寒之意請自今遇科場補試監生如故仍以
四百五十人為額從之尋又增一百五十人

長編

神宗熙寧元年五月戊戌國子監言自來補試國子監生以六百人為額今科場三年一開竊見開封府國學各增解名三分之一四方士人以此盛集京師欲乞監生人數亦展一分以九百人為額從之○

長編

元豐三年五月編修學制所言奉旨立勢要及國子監生太學官親屬許不以鄉貫就開封應舉之法臣等看詳監以國子為名而無國子教養之實恐未稱朝廷建學育士之意乞應清要官親戚並令入監聽

讀以二百人為額解發毋過四十人從之

長編

哲宗元祐七年六月癸丑禮部狀近準都省批狀勘會開封府遇科場歲多有四方舉人冒貫畿縣戶名取應及太學生員依條須在學及一年方預就試其間有未及一年之人亦不免有寄貫取應之弊檢會舊制國子監取應舉人先於廣文館補試給牒取應今欲復置廣文館生員今再行看詳開封府進士解額一百人即乞依舊外將本府諸科二百人并國子

生四十人共為二百四十人解額並撥屬廣文館廣
文館生員以二千四百人為額并國子監狀太學生
員上舍一百人內舍三百人外舍二千人元祐五年
發解國學舉人每五人四厘二毫一忽解一人詔依
禮部所申今後太學舉人并國子生發解並依元祐
五年發解取人分數施行

長編

○紹聖二年二月甲午

罷廣文館解額及將國子生四十人發還本監從之

長編

武學

文武一道也由三代而上教出於一而文武之才各適其用由三代而下教出於二而文武之才徒相為訾古之為學必取士取士必文武其教養之法非有二也堯舜尚矣舜之政猶見於書益稷曰侯以明之蓋以射侯之禮致衆而論士則文武皆其選也禮曰受成於學出征執有罪反釋奠於學以訊馘告詩曰在泮獻囚又曰在泮獻馘三代之學文武豈二途哉

王臺先生
諱賞文

漢時隴西天水上郡北地材官騎士布滿郡國

高祖雖未嘗設科而一時猛將或出於餓隸韓信黥

徒黥布鼓刀樊噲販繒灌嬰之賤自是之後雖有勇

猛知兵之選成帝始立勇武明法之科平帝詔舉明

法戰陣詔舉武猛堪將皆安帝詔舉武猛謀謨明帝

詔舉明戰陣之畧詣公車靈帝卒未有得人如高祖

之世者

唐又別立一科謂之武舉而進士武舉遂兩立矣

武后長安二年始置武舉其置有長塼馬射步射平射筒射又有馬槍翹關負重身材之選亦以鄉飲酒禮送兵部其選用之法不合於道故不復書

唐志

玄宗開元十九年兩京諸路各置太公廟以張良配享春秋仲月上戊日祭武學人准明經進士行鄉飲酒禮取自古名將十哲七十二弟子

肅宗乾元元年不以張良配享上元元年太公望追

封為武成王享祭一同文宣王正元二年刪去十哲
德宗正元中關播奏言仲尼十哲皆當時弟子今以
異時名將列之弟子非類也乃去十哲之名於是諸
儒爭言太公於聖人非倫也宜去王號獨令孤建以
為勿追王爵宜以時祠為武教主自是始有武學為
文者習章句而嗤武士為武者習騎射而誚文儒二
者殆若冰炭矣

玉臺先生
諱賞文

宋朝太祖皇帝幸武成王廟觀兩廊名臣繪像指白

起曰此人殺降不武之甚以杖畫之

實訓

○修武成王

廟令張昭實儀詳定配享功臣以吳起孫臏廉頗韓信等二十二人不克令終並退之復升灌嬰耿純輩

梁周翰表陳其事上曰升降之制蓋有所懲勸周翰

未之思耳

同前

○開寶元年上令諸道解武舉者命李

昉扈蒙試問所習之業皆無悉令罷之○開寶八年

詔郡國有文經武畧堪任用之二十已上五十已下

具名以聞仍速赴闕當考其臧否以進退之

並要覽

太宗嘗幸武成王廟指郭子儀李晟畫像咨其功業

且曰德宗為奸臣所誤非晟則祚去矣

事畧

真宗咸平二年上北征趙安仁上言當今有至要者
五其三求軍謀今武舉已行其軍謀深遠武藝絕倫
科望依唐故事

仁宗朝富弼言應制科者必樂為賢良方正才識兼
茂耻為將帥邊寄之名蓋今人重文雅而輕武節也
武舉者蹶張馳射儕於卒伍所得庸妄鄙淺固不敢

望得異士但稍能警勵有廉耻則焉肯為卒伍之事
乎臣請詔近位及藩鎮於文武官中各舉明兵法有
威果習練武略堪任將帥者一二人

皇監

○蘇洵上書

可復武舉而為新制以革其舊弊且昔之所謂武舉
者蓋疎矣其以弓馬得之者不過挽強引重市井麤
材而以策中者亦皆記錄章句區區無用之學其取
人太多故其所得皆貪污無行之徒豪傑之士耻不
忍就宜因貢士之歲使兩制各舉所聞有司試其可

者而陛下親策之權略之外便於弓馬可以出入險阻勇而有謀者不過取一二人待以不次之位試以守邊之任

皇監

○天聖七年閏二月壬子又置武舉以

待方略智勇之士其法皆先上藝業於有司有司較之然後試秘閣中格然後天子親策之若武舉則仍閱其騎射焉

長編

○天聖七年因唐之制置武舉應三

班院使文武子弟實有軍謀武藝許詣兵部投牒取應先投軍機策論三卷每卷三道召人保委主判官

先詳所業視人才驗行止先試步射一石弓力馬射

七斗弓力問策一道合格即引見召試

會要

○寶元間

詔兵部試武舉人以策論定去留以弓馬定高下

聖政

○慶歷二年十二月壬寅詔兩制舉文武官各一員

為武學教授從賈昌朝之言也

長編

○慶歷三年五月

丁亥置武學於武成王廟以太常丞阮逸為武學教

授

同前

○慶歷三年八月戊午罷武學改武學教授太

常丞阮逸兼國子監丞其有願習兵書者許於本監

聽讀既立武學議者以為古名將有諸葛亮羊祜杜預裴度等豈嘗專學孫吳立學無謂故亟罷之

長編○

慶歷三年後胡瑗上書請興武學其略曰頃歲吳育已建議興武學但官非其人不久而廢今梅堯臣曾注孫子大明深義孫復以下皆明經旨臣曾任邊陲頗知武事若使梅堯臣兼隸武學每日只講論語使知仁義忠孝之道講孫吳使知制勝禦敵之術於武臣中選子孫有智略者三二百人教習之則一二年必有

成效臣已選武學規矩一卷進呈時議難之

呂原明記 ○

皇祐元年八月丙戌御崇政殿試武舉人得何景略

等三十七人授官有差

長編

○皇祐元年九月己未詔

曰國家采唐室之舊建立武之科每隨方聞之詔並
舉勇略之士條格之設歲敘已深然而時各有宜今
異於古尺籍之衆旣以其技力自奮於行伍之間武
弁之流又用其韜鈴自進於軍旅之任來應茲選殆
稀其人如間所隸習者率逢掖諸生編戶年少以至

捨學業而事籌策矯溫淳而務麁猛紛然相效為之
愈多朕方恢隆文風敦厚俗尚一失其本恐陷末流
宜罷試於兵謀俾專由於儒術尚慮積習且久頓更
為難就其等倫裁為規制其將來武舉科場人曾經
祕閣考試者即許投下文字外更不許新以取應以
後科場令罷武舉一科大詔令○皇祐中嘗罷是科言
事者以文武並用廢一不可宜復此科分為三等上
等取其學識深遠策對優絕次等取其策對優長騎

射兼有下等取有擊刺拋射翹傑魁俊量能而官因材而任委以巡警之司縣尉之職觀其提一旅之衆佐一司之重能激勵士卒翦滅盜賊然後取而用之豈不利於國家乎豈不有勝於卒伍而為之乎惟陛下復之無疑會要○嘉祐八年密院奏以為文武二選不可闕一與其任用不學之人臨時不知應變不若素習韜略之士緩急驅策可以折衝况今朝廷所用人稍有稱聲者多由武舉而得則此舉不可廢罷明

矣

英宗治平元年九月丁卯詔復置武舉

按會要嘉祐八年十月八日密院初建請治平元年三月二日王珪等上條件二十一日賈黯乞試韜略四月九日詔六月十五日并八月十九日密院奏皆武舉條件今依實錄聯書之仍略刪修使不相抵牾蓋嘉祐八年始議治平元年九月議定乃降詔其降詔因緣密院建請并治平元年九月

方建請也

神宗熙寧三年八月翰林學士司馬光言奉敕考試武舉人而法當先試弓馬若合格即試策略緣弓馬以選士卒之法非所以求將帥者也不幸而不能挽強馳突則雖有策略將帥之材不得預試恐非朝廷建武學之意況試弓之法挽與弛齊尤不應格自今欲乞試策並挽弓及弛者皆聽就試中書請如舊制上批再相度卒如中書所請長編○熙寧五年六月乙

亥樞密院言仁宗時嘗建武學旣而中輟乞復之詔
於武成王廟置武學選文武官知兵者為教授凡使
臣未參班並門蔭草澤人許入學給常膳集諸家兵
法教授官纂次歷代用兵成敗及前世忠義之節足
以為訓者講釋之通鑑○熙寧五年初密院修武舉條
令不能答策者止答兵書墨義王安石恐入官太冗
兼近方以學究但知誦書反愚魯不曉事廢之今又
置武舉墨義一科其所習墨義又少於學究所取武

藝又不難及則當時為學究者乃更應武舉若收得
如此人作武官亦何補於事上曰朕亦語密院以墨
義不可用至是再進呈武舉條制乃悉從中書所定
上同○熙寧五年立武學於御路之側於是詔舉人先

試以孫吳大義元豐二年其策武士有曰朕以經法

先聖莫不以兵為大事是以設科置學冀足以延知

兵之士

聖政
編年

○熙寧五年閏七月壬子詔武學生員

以百人為額遇科場前一年委樞密院降宣命武臣

路分都監及文臣轉運判官以上各奏舉堪應武舉者一人其被舉人遇生員闕願入學者聽仍免試生員及應舉者不過二百人春秋各一試步射以一石三斗馬射以八斗或弓八斗矢五發中的或別習武伎副之策略雖弓力不及學業卓然者並為優等補上舍以三十人為額三班使臣無贓罪及私罪情輕仕族或草澤人無違負亦聽入學量試馬射以六斗步射以九斗策一道孫吳六韜又十道以五通為合

格春秋試內舍生馬步射馬戰應格對策精通士行
可稱者上樞密院雖不應而曉術數知陣法智略可
用或累試策優等悉取旨補上舍武藝又進者樞密
院審察人材旋加試用

生員及應舉者不過二百以下至旋試用並以選
舉志增入實錄武學言乞在學生員春秋各一試
至三十人為額及三班使臣至五通為合格並係
之八月八日令并從本志入此又實錄六年八月

一日與此相重略有不同處今兩存之

長編

熙寧五年九月辛酉詔武學士試大義十道分兩場

從御史劉孝孫請也後試武舉人亦如之

長編

○熙寧

六年八月壬申朔武學言春秋試法內舍生馬步射
馬戰應格對策精通士行可稱者上樞密院補上舍
生雖不應格而能精曉術數陣法智略可用或累試
策優等別取旨補上舍武藝策略累在下等者復降
外舍上舍無過三十人別齋增給食如累試又優等

及武藝進者上樞密院審察人材試用從之

長編○熙

寧六年九月辛亥御崇政殿試武舉進士凡武舉初試義策於祕閣武藝則試於殿前司及殿試則又試策於庭於是詔武舉人策入優等武藝又入優等與右班殿直武藝次優與三班奉職末等與三班差使減磨勘二年策入平等武藝優等與奉職武藝次優與借職次等與三班差使減磨勘二年末等三班差使

長編

○熙

寧六年九月丁巳賜武舉進士文煥及等

注兩使職官熙河路準備差遣侯抱真而下二十三
人授以班奉職借職差使緣邊差遣後復賜煥進士
及第為梓夔路察訪司準備差遣

長編

○熙寧七年二

月庚午樞密院言武舉補試生員前此無立定時限
四方游士困於伺候乞隨在學上舍生以春秋二時
引試仍下進奏遍行庶使遠方通知朝廷招徠之意
從之○熙寧八年七月戊辰試武舉人先試孫吳六
韜大義共十道為兩場次問時務邊防策一道與鎖

聽人同考試馬軍司試弓馬差官監試武舉試格前後參錯至是始加裁定長編○熙寧八年八月庚寅別

試所言武舉人試孫吳六韜大義六韜本非全書義理訛舛無所考據欲止於孫吳書出題從之長編○元

豐七年十一月丁未詔應武舉及試出官並依進士
討大義一場第一等取四通第二等取三通第三等
取二通並為中格從司業翟思朱服所請也長編

哲宗元祐元年六月甲寅看詳太學條制所狀續準

指揮國律武學條貫令一就修立檢準官制格國子
監掌國子太學武學律學算學五學之政令○元祐
六年十月庚午幸武成王廟

徽宗崇寧三年九月壬辰詔諸州學別為齋舍教養
材武之士隨人數多寡許令入學並依進士法其考
選較試并補取令武學條制別看詳修立頒下○
長編

崇寧四年正月丙申尚書省言乞諸州教養武士附
於州學參酌武學成法修立考選等格從之○
長編

寧四年六月丁丑詔諸州武學習射馬許私置不得過五疋仍官給草料如不能私置用學事司錢置三疋

編長

○崇寧五年九月甲寅學制局言臣等檢會崇

寧三年九月二十二日朝旨諸州縣學別為齋舍教養武士續有條畫頒下諸路後來入學之人已多昨因今年二月廢罷未曾復置臣等伏覩御製學校新法內一項逐州解額五路已有指揮十人取一名可令前旁所解額於數內以一分充貢武士額臣等未

審今來立教養武士法合依舊遍行天下或止於三路五路施行乞降睿旨別具合措置事件聞奏御筆山西出將氣俗使然所當先者至如餘路間亦有之平治之時武不可廢可依已降指揮置武士齋仍以所給解額取一分充貢額有則貢無則貢文士長編○

大觀元年十一月庚申御筆天下材武之士漸向學校今在學之人多寡不同訪聞河東路有六百六十人貢十人永興軍路有一百九十人亦貢十人多寡

相遠未為均當可以諸路並以在學人數十五人貢

一人

詔旨

○大觀二年七月辛未前宿州州學教授胡

伋言乞武士與文士別場引試及馬射八斗九斗一

上垛並理作分數從之

長編

○大觀三年十月丁酉知

樞密院事鄭居中等上大觀重修武學并諸路州縣

學武士敕令格式等二十七冊詔頒行之

長編

○政和

元年正月己丑詔武士舉額可以國子監所立一百

六十九人之數下諸路充貢額武舉省試舊來正奏

名止三十人大觀元年已後所增人數比舊奏名猶多二十人本為貢士今來科舉可於舊試奏名額內除豁三分充科舉奏名長編○政和三年三月丙辰詔

武舉博士依太學博士法朝廷差人詔旨○政和三年

六月丁巳詔武學州縣外舍生稱武選士內舍生稱

武俊士餘依四月三日已降指揮長編○政和三年六

月丙寅武學博士孫宗鑑言武士馬射優劣之格上

堦中貼皆有等第分數而中的獨為闕文則貼廣三

尺二寸而的又十之一其工拙不同明甚今一中貼比兩上塏乞以一中的比兩中貼從之旨詔○政和三

年八月丁丑提舉京西南路學事陳適道言大觀武

學令諸外舍三經公試若內舍三經試上舍而不與升

貢或三犯第三等以上罰者外舍除籍內舍臣欲乞

於曾犯第三等以下罰字及添三經校定而不與

選十字庶免虛占學籍有妨後學從之旨詔○宣和二

年七月丁卯詔武士該貢人特許貢發小學上舍上

等特許赴來年控試如合格與補太學外舍太醫學
俟殿試人特許赴來年特奏名試

長編

○宣和二年十

月己巳尚書省言契勘州縣武學已罷內外願入在
京武學人乞依元豐法試補入學舉試入舊制係與
武學外舍人類試取一百人同上舍生發解緣科舉
已罷今比倣新舊法令尚書省於大比前二年春季
檢舉降敕下兵部依元豐法奏舉其備舉人限當年
冬季到闕與免補試入學稱外舍生依與校定人赴

次年公試其考選外補推恩並依大觀武學法從之

長編○宣和二年十月甲申臣僚言州縣武學已罷諸

路見任武士教諭總二十四員自今隨事減罷今京

畿京西路申明乞罷者才三人爾其在任者猶衆也

契勘雖有武士該貢人特許貢發指揮而諸生弓馬

行藝已成校定無所加損其於教諭無委職事特降

睿旨並依省罷從之

長編

高宗紹興三年四月庚子給事中黃唐傳乞立武選

之格以科舉人數三分之一待武士中第者注縣尉
他日有統兵官闕並先選武士詔兵吏二部條上建
炎中國子監併歸禮部丁未始詔駐蹕所在國子監
量養士仍置博士然未果行焉○紹興十一年三月
庚子朔上曰賢將與才將不同賢將識君臣之義知
尊朝廷不專於戰勝攻取唯以安社稷為事才將一
意功名爵賞專以戰勝攻取為能而未必識朝廷大
體及社稷久遠利害要須駕馭用之上又曰文武之

事雖同而事實異世稱衛霍不薦士為賢蓋禦侮折衝將帥職也何與薦士祖宗故事樞密院不與進擬蓋知文武之事異也○紹興十六年二月壬戌上以文武之道不可偏廢三月庚午朔詔興武學養士其後以百人為額置博士員○紹興二十六年四月己卯上諭執政曰文武一道今太學以就緒而武學幾廢致有遺才祖宗武學養士自有成法可令禮兵部速具以聞○紹興二十七年四月壬戌進呈保義郎

閤門祇候趙應熊擬江南東路安撫司準備差遣上
宣諭曰朕觀應熊所試弓馬文字皆有可採可謂有
用之材徽宗皇帝時如馬擴馬識遠皆以武舉擢用
今來所得亦不可謂無人湯思退曰應熊初入仕且
以帥司準備將處之以養資望上曰善

臣等曰文武之判久矣儒者悉不知兵而勲門將
閥號為知兵者又不過善擊刺工騎射臨陣能死
敵耳其知不足言也故太上皇帝思得有用之才

用之惜乎有司不能推原聖意所出也夫有軍功
有捕盜賞有武臣蔭補而又設為武舉一科或者
其不止於求騎射一藝乎今有善兵如孫臏知權
識變如張子房而足不便鞍馬力不挽石弓則有
司望然拒之曰非設科意也嗚呼其亦拘矣誠願
詔舉者先韜略後騎射而明告之以馬擴馬識遠
必用之意使天下曉然知異時長驅伊洛而泥封
函谷者在此而不在彼歆然慕之遲之數年縱不

得人獨不愈於屈天下韓范使與郭狄等伍以倖
萬一之歡乎

孝宗即位創置武學○乾道元年上問輔臣曰近日
曾有武人赴試否洪适奏曾有數人至都堂投狀乞
試已行下吏部令赴武學收試上曰前時立法亦不
至嚴否适奏係文臣銓試舊法十人取七人今武臣
既不能弓馬須要試七書義亦少抑入仕之路上曰
得他少知義理甚好○乾道九年輔臣進呈樓源乞

令太學生習射藝事上曰古者命將在公卿之列有
文事者必有武備鄭聞奏射御六藝之數古之文武
未嘗分也上曰紹興重修學令既許習射可令有司
討論上又曰向來玉津園燕射唯武臣恐祖宗典故
文臣亦當與射可併討論以聞○淳熙元年輔臣進
呈奏名進士射殿最上曰進士射前來未嘗舉行今
可將中上等人優加旌賞以示激勸○淳熙元年詔
近舉行燕射之禮可令臨安府於城內踏逐近便寬

閑地段建置射圃以備百僚職事之餘習射○淳熙
二年上御射殿進士第五甲及特奏名按射上顧行
間有黎華者遣內侍問姓名上曰觀其人物服飾似
壯士射亦閑習宜略與旌別旣而傳旨黎華可特免
銓試與注黃甲差遣上又曰自此須立一規矩今將
帥稍知書曉文書禁衛出身如光武故事令習孝經
使文士能射御武士知詩書

總論

有文學有武學養之於未用之先也有文選有武選
用之於既養之後也然則科舉之法既有文舉矣烏
可不有武舉乎

宋朝制科有六而武事居其二又外置武舉以待方
略武勇之士時蓋天聖七年也行之二十年而罷罷
之十有五年而復是故以策論定去留以弓馬定高
下寶元制也先試大義次試時務邊防策又別試弓
馬熙寧制也以此而取士則其得人當不居唐之子

儀下而或者猶曰弓馬不過麁材策論亦為無用蘇
老泉之論謂不若方略有謀者之可用也武舉者蹶
張馳射儕於卒伍稍有廉耻則焉肯為富文忠公之
論謂不若威果武略之堪任將帥也是則然矣然亦
嘗觀嘉祐議臣之奏乎今朝廷所用稍有聲稱者皆
由武舉而得此其所取豈得謂之無益於世者如富
如蘇之論特不過謂來者猥多取者不擇而豪傑之
士有不屑就焉爾如執此以議武舉君子謂之不知

務並見前
林駟文



羣書考索後集卷二十九